

遜

學

齋

詩

鈔

序

予讀詩三百篇而知古詩人之立言各有其體也十五國之風大半出於勞人思婦之所作與夫民俗歌謠之辭故其言微而隱其旨婉而曲使人讀之不能卽得其意之所主而抑揚反覆常有存乎文辭之外者蓋其人固微者也情之所感事勢之所激耳目聞見之所觸不能已於言而又有所不能明言故其言如此若夫大小雅之作者則皆王朝之卿士大夫也其上者爲周公召公卽下之亦家父凡伯之倫也故其爲詩往往陳祖宗之功德王業之艱難而中葉以後政事之得失民人之利病君子小人之進退中國夷狄之消長無不見於其詩視風人之辭何其異哉蓋言出於人其人不同其

言亦異而世之論詩者執一以概之徒見風人之辭微婉而不盡以爲詩教固如此是有風而無雅矣瑞安孫琴西子同年友也其人疎簡寬易而常有當世之志戊午歲天津戒嚴舉朝爭和戰未決琴西時以翰林直上書房兩進封事言甚切是年夏遂拜出守安慶之

命攜家累出都因兵阻迂道吳中予適寓吳得相見蓋自別於京師已四年矣出所箸詩十卷屬余校刻且語余曰刻成後勿遽播我詩以我詩多狂言也予謂君以一書生受

天子知遇入史館直內廷雖由草茅進非家父凡伯爲周之世臣者比然固從中朝卿大夫之後矣方今

天子神聖朝廷清明而海疆不靖垂二十年君預修

宣宗成皇帝實錄備知其事本末又自粵賊踞金陵蔓延東南數省爲

宵旰憂而君官京師聞見尤近憂時感事之忱不能自己而發之於詩此豈得謂之狂言哉予固不足以知詩然嘗讀三百篇而知詩人立言之體刻琴西詩竟因書此於簡端爲讀琴西詩者告至其詩上追漢魏而近作尤似蘇黃世多知之故弗論也咸豐九年夏四月德清俞樾

敘

咸豐戊午之歲與孫君琴西遇於毘陵道中君方以待從出  
守安慶連夜雨之舟擊渡江之楫慷慨形於顏色篇什載於  
巾箱偉其言論篤申契好維時紅羊劫重青犢氛狂東南數  
州震颺尤厲君旣杖策以從戎僕亦枕戈以待旦瘡痍載路  
嗟流涕以何言烽火互空幾望遠而目斷戎馬倉皇晉書閣  
別蓋六載於茲矣君之攝廬鳳監司也承彫勅之餘集流亡  
之族蠲緩關權輯錄孤忠馭吏首廉治民不擾時余督師袁  
浦擊柝相聞抽毫可紀郵書所達惠政長流適緣巨憝就殲  
生民歡慶公餘多暇載理舊編望玉堂而畱夢只在人間挽  
銀河而洗兵又逢今日鄭重以遠徵元晏檢校以重付手民

寫山川之勝槩未倦輪蹄溯京洛之清遊難忘尊俎寥寥往  
昔歷歷前塵輒以小言附綴簡末至其詞句之工風骨之古  
匪俟言傳是望讀者同治甲子孟冬盱眙吳棠

遜學齋詩鈔卷第一

瑞安孫衣言劭聞

古體詩八十首

新居

甲午

新居非求廣適志在容膝偶令誅蓬茅畢役期不日幽阻盤  
之中山翠常在室雖與雞豚鄰幸無俗屨及春光晨澹沲霽  
景昀陵隰東風來啟扉花氣競芬苾候禽多好音芳草亦爭  
出於焉敦素心千秋想靈匹

寄周仲梅

慶枏

乙未

憚寒守林扉伏首等潛蛎在寂思故懽慨焉念此別遠椒沍  
輕煙幽素寄遙月昔聚炎景脩今此芳草歇夙欣知未疏新

暑歎易閱凍雲晦夕陰空山已風雪

重過江館訪仲梅

丙申

初景媚川光孤懷赴清迴輕橈逐微波未午已維艇登岸遵  
故蹊雙扉掩幽靚蒼苔雨後多行跡新可省雅儔亦能來塵  
事日漸屏復此花閒盃紆彼風前軫相思大江西別後空矯  
頸

菊花

丁酉

霜氣日淒栗孤花粲黃金本無春華翫保此遲暮心西風在  
庭檻夕露浩已深幽人不可期月明秋惓惓

無錫泊舟望慧山

戊戌

山色依篷窗落帆對脩嶺蜿蜒九龍山嵐霏臥幽靜樓觀棲



遠椒松竹掩人境石路林間暝霞姿天外永縛屐勇難賈登  
高跡誰省清泉初出山雪甌堪瀹茗坐久夜波生疎鐘白雲  
冷

晚由月湖出大江順風抵瓜洲宿

枯蘆鳴蕭蕭布帆使其半騰波渺長空激箭矢近岸焦山金  
碧城回首猶照爛雲表妙高臺樓觀屹霄漢南徐樹若浮北  
固青欲斷戀奇目無留迴睇神屢眩渺焉千里輕安得淩汗  
漫落帆向渡頭燈火瓜洲晏

雨後

微雨窗外過庭柯出新沐檻戶依春風疏簾納餘綠氣候乘  
滋長生機日蔥蒨翫時適曠衷感物觸遙目我有礪中廬南

薰已芳馥白雲不出山依依在曾麓

黃樹齋鴻臚

爵滋

招集陶然亭賦呈二首

佳招踐幽期素尚違炎景野色合叢葦遵途得佳境薜蘿靜  
若迎車馬翳斯屏芳檻兀登臨萬象皆超迴人心涉高曠遂  
與清虛併白雲生晝陰微陽自遙嶺疎蟬飄遠音秋意在松  
頂長安苦緇塵卽此一矯頸

西山秀天表淡煙青濛濛頗似高臥者  
魚絕塵外蹤我胡困  
闐闐復此林下棕曠覽征鳥外納景疏  
函中輕颺出  
挾葉微涼已在空  
人事謝煩鬱  
天懷訴所同  
碧陰浮盃酒  
涼露來盪胸  
奇趣忽超越  
愴恍如有逢

葉潤臣同年

名澧

風雨懷人圖

密雲在郊寒在戶秋風日夕芭蕉語幽人抱琴不可彈流水  
高山難復難煙波千里漢陽路落日黃塵薊城樹門外飛鴻  
知汝心一聲南去洞庭深

送蘇菊村同年

源生

歸鄢陵二首

黃鳥懷好音嚶嚶鳴中林枯桐慕雅耳切切爨下吟僕居滄  
海俟君家汝水陰東風吹行雲忽然棲同岑天性旣投合孤  
芳長在襟以君惓惓意彌切我所欽比石志愈潔涉淵情愈  
深世人多反覆我當懷素心

金馬同射策風塵驅敝車家貧須微祿豈爲紫與朱君家有  
老母睨景臨桑榆我親昔送我揮淚卽首途白雲各何往望  
遠同踟躕君門自咫尺下士仍泥塗我才愧雌伏君乃鳳

在笈雌伏我敢安鳳德當不孤榮名匪外至勗哉千金軀

雜詩三首

投人雙明珠弗笑反見瞋西施賤浣紗豈聞歌倚門我佩莫邪劒光采常如新藏之寶石匣襲以紫錦茵莫疑在風塵會有望氣人

弔舜蒼梧野古人悲已死瑤池謁仙母青霜掩兩耳杯酒酌羲和揮戈或我止羲和笑吃吃回首謝下土赤龍未及鞭去汝忽萬里

芳洲采杜若終朝不盈掬終年力南畝乃穫穀十斛晨駕期千里日夕鋏厥轂太華如削成豈爲黃土覆夸父逐白日棄杖猶爲木

短歌贈汪孟慈員外

喜孫

藏書十萬卷不能療朝飢仕宦二十年妻孥猶餽糜日種梅花夜讀史世閒賢者甯有此汪侯汪侯勿復愁榮華富貴東流水

升天行

我夢登天門天門九扇訇然中開其光如電聲如雷一解瓊  
堂玉除上帝所居清虛蕩蕩深莫闢金人十二左右趨二解  
猊猶目出怒不可測是何神靈在帝之側三解下土蟣蝨臣  
再拜稽首言臣欲前臣不敢前目睜睜持天門四解蛇磨鱗  
兮虎踞其齒天庭耿耿尺地不容爾雲霾兮沈沈擠汝落兮  
下無底五解嗟嗟兮上帝之仁首叩關兮不聞吁嗟帝兮甯

不仁持天門兮鬼神

六解

張亨甫

際亮

武昌書來賦此寄畬余與亨甫尙未相見

也

先生隻帆黃鶴津懷人卻向長安塵長安六月熱炙骨日讀  
君詩涼欲雪平生不識元紫芝懷中喜有清風詩白雲千里  
未得報長安木落風颼颼君也風塵東西走我亦土牛落人  
後今君合返黃華峰我尙異鄉愁飄蓬寄書答君秋復冬到  
時已有南來鴻

入城以來清侶隔絕今日宗丈滌樓

樓辰

見過姚秋士

賦桐

後至殊慰岑寂卻寄滌翁秋士並簡諸同人

紉蘭慕素芳熱椒有同氣世情逐雲浮我懷獨霞契入城始

旬日維藩就羈繫深巷迴故車重闌阻遐睎稽古或神迎居  
今已迹異哲友能我來深談如啟翳執筵幸尋聲投濁豈合  
齊解轄恨未留結帶終罔繫跼然喜谷音賢者同所寄

答潤臣

天時有超忽人心隨變更與子始相見膠固由精誠有言不  
敢贈深恐肝肺輕感子相愛厚千秋期令名嚴寒向歲晚良  
知多盛情吾身在岐路竊復憂平生

黃河萬里流不爭溝中澗鳳皇盛毛羽甯矜凡鳥翰人生千  
載下立身良獨難豈謂當世士但覺俯仰寬大寶貴自取芳  
柯無常觀願言勉元髮望古空長歎

雜感十二首

錦衣利鞬躬朱戟利屈膝縫掖乃突兀揖讓在一室豈聞仲  
尼徒乃有媚世術李生非凡人奇氣不世出峩峩高將軍老  
奴手指叱坐此仍蹭蹬骯髒觸時疾傲骨固宜窮富貴等寒  
乞功名吁可憐千秋念靈匹

落日易水上照見黃金臺千金市駿骨昔王嘗求才未聞天  
下士遂爲黃金來求之尙不可矧乃賤棄哉驂騮散滿野負  
轅亦可哀王良飛上天誰爲驅龍媒

文章已小道末流況徇名虛聲在天下方寸羞不誠淮南丹  
桂樹空山自懷馨清風在林澗芬芳亦已盈

漢家翟丞相官高多黃金灼灼攀龍客誰知侯門深朝食錯  
珠履暮宴墮華簪一朝罷官去門冷容羅禽楊花與萍葉流



波隨浮沈勢至一呼集時但誰能禁一貴復一賤乃知君子心

妙調喜折楊大笑歌白雪達人崇寸心下士掉繁舌金鐘求眾聽竊恐雅樂缺子有懷中珍光采久當別掩耳不忍聞蒼蠅莽嘲啗

越禽五色毛厥毒不可攬野草食殺人狀乃類黃精文章美蓋世烏能測其情元亭邃經論投閣命已輕琳瑯彫兩轂履險終顛傾詩書有辱行六藝難爲名

平地多网羅昔人自明哲疾行冒荆榛誰云匪疏忽范生天年申屠藏其潔甯慕瓦礫全所畏圭璋缺願師展季言一謝任公伐

靡靡野田蓬穢生無東西偶私雨露潤亦得成芳菲託根慕  
下隰引蔓周曲蹊狐狸避黃犬聚族就安棲蕙草旣失所顏  
色何慘煖安得青女怒朽株化爲泥

朝歌結客行暮歌結客行結客裘馬子安能託平生密友或  
割席異國猶班荆莫謂富交好莫謂貧交輕爲壽千黃金君  
謂誠不誠

嗟嗟雙黃雀結室庭上木字汝室中兒睨我倉中粟出入以  
晨昏喔咿聚厥族反覺所天全志不餘飲啄人生獨何營飽  
煖意未足脫身棄鄉縣強顏向童僕瞿塘舟折檣太行車覆  
轂可憐骨肉乖還與憂患屬

青青邱中蘿施彼道旁榆喬柯獲依託雨露私其餘回顧笑

蓬葆自云光采殊哀哉斧斤虐一朝相抱枯因人爲榮落安  
得葆根株嶧陽有嘉樹孤生自扶疏

文字始開闢創者爲聖神天人揭昭炯物情亦燦陳淩遲百  
世後鄒魯挽使淳儒生尺寸柄乃以文章信西京六七子精  
理猶紛綸刻苦爲我道豈曰光一身斯文有升降往往日懷  
新誰謂珠玉美突過五穀珍

綠牡丹爲汪孟慈作

桐花小鳳毛毳毼飛入花閒作花胎官黃御紫各矜寵繁豔  
羞向君家開蒼水仙人削蒼玉絳妃百杵碎如粟輕紗玉盆  
春四圍作詩但怕臙脂俗

蓮花橋歌

蓮花橋在春陵都溪道光十一年鄉人李嘉雋以土  
兵走逆獠於此橋卽其祖諱大年所爲也湯蠖信甫  
爲之圖徵詩於都中宗滌樓屬予賦之爲作長歌

都溪溪水波漣淪都溪水邊多行人行人日暮渡不得亂石  
齧足風斷津溪頭老翁坐歎息囊中出金不知惜長虹鞭石  
紛前驅頃刻千里成通塗此地春陵山水會五溪壤出桺衡  
桂客來手摩石柱圓但道李翁還墮淚翁之化去今再傳翁  
名與橋垂千年豈惟翁名垂千年屹若長城持鉅川前年盜  
發黃溪涘蘆笙倒吹藥染矢蠻奴勢面黃戰裙牽馬欲飲都  
溪水翁也生子子生孫竹竿召士弓腰韃當橋疾呼目灼電  
叱賊賊走東西奔都溪咫尺不能渡永州始敢朝開門新田

甯遠還猖獗九疑山前多白骨 朝廷幾輩司城池柰何醜

類猶奔突此橋安得攖其鋒書生殺賊能從容南山不移橋

不動都溪之水青磨銅橋邊居者三百家黃雞祭社收桑麻

烽煙脫免誰致此不爾豈特愁濤波近者亦有馬湖賊近聞川西

有孫夷警當街斫人強奪食此輩鼠竊何能爲但恐玩弄成衝軼

君不見書生殺賊賊遁逃都溪猶有蓮花橋

黃鵠曲爲海甯楊節母作母陳氏楊孝廉某母

黃鵠黃鵠鳴聲悲朝行索哺暮不得安棲風來摧巢毀其枝

一解黃鵠鳴鳴無悲上有滄浪之長天下當顧黃口兒黃鵠

之悲天知之二解天知之黃鵠之子化爲長離三解

正月十八日集葉二潤臣風雨懷人館偕湯海秋郎中

鵬蘇賡堂編修

廷魁

黃蓉石刑部

玉階

卽席二首

己亥

幽居苦不悅切切懷所懽所懽漢陽子意氣陵雲端哲人病  
離索亦用慰孤單疎星明在戶河漢流漫漫高堂各盡酌無  
爲待夜闌

塞蘭漢北渚采杜江南涯江漢中迴沮蘭杜芬相依懷芬果  
同氣千里何所疑矧此良夜燕相視鐙燭輝君看異日事甯  
違尊前期

樹齋先生招集江亭餞春賦呈諸同人

南陸啟長羸蒼律忽已革綠陰掩廣衢薰風在前陌流光無  
裊真代謝甯有迹人生老大悲積累此旦夕況彼時運駛盛  
衰日推激耿耿弄芳條悠悠卽瑤席誠恐朱榮更遂與廩秋

迫爲語同心人勉矣百年客

江上草堂歌三首

我家江上舊草堂七月八月蒹葭香秋江老翁燒楚竹生致  
團臍黃抱穀竭來長安飽黃塵門外白鷗笑殺人  
有田有田龍山麓春收大麥夏收菽蒼頭釀酒眞珠紅長腰  
晚炊白勝玉負鋤釋手還承歡金珪無分老亦足  
窗前老梅腹如槎年年盛放霜中花花開撲地啄紅玉小禽  
踏枝一身綠長安禿柳黃垂絲江上青山風雨時

醉歌

瑪瑙之盃琉璃紅主人好客坐生風一斗不醉醉十斛酒聲  
入腦鳴隆隆丁香沃火象鼻銅赤金流汗煙浮空雪花壓瓦

玉階白解下狐裘還送客雪中故人來叩門三日不食衣無禪

短歌三首贈黃子幹

秩林

庚子

丹山珍禽五色毛節節足足求其曹雲鵬踴躍在中路羽翼相逢卻相顧秋風大澤鴻雁肥文章在身衆所疑聖人宮中九韶響與我他日無差池

南望瀟湘隔洞庭九疑天連蒼梧青美人相思惜遠道獨抱芬芳爲君老中田靡靡荆與蓬野風吹汝無西東芳洲杜若不可采香氣獨與幽蘭通

義和鞭龍走萬里夜迫望舒西入海夸父杖折安能追今我不樂今日月飛我將學仙拾瑤草丹砂未成人已老復思爛



醉習家池百年可惜玉山倒五陵原頭石駸駸童牛礪角聞  
樵歌黃河走霆無回波丈夫七尺今如何

苦熱簡滌樓

長安大熱驅火雲黃塵可畏車兩輪城東流水城西來垂楊  
不見城西闌買冰瀹茗能相待微雨新涼一訪君

女貞行爲山陰徐節婦作

節婦潞安府知府吳秉鈐女監生徐志曾妻湯副相  
金釧爲之徵詩

今者女貞木昔爲雙梧桐梧桐乃在稽山峯枝枝相抱葉葉  
同摧枝折葉嗟嗟烈風鴛鴦血盡哀其雄嗟嗟勿哀翁與姑  
還顧巢中字其雛昔也號食今返哺

叶平

艾至堂楊北度雁門圖

雁飛不度橐駝愁青山千仞截馬頭  
儒衣七尺北風疾白日欲落關山秋  
單于臺高陵白樓長城故鬼鳴啾啾  
陰山小兒汗血馬關弓欲射南幽州  
武靈怨結幾千載邊頭戰血腥髑髏  
聖人飛龍起東極手挽扶桑拓西北  
陰方侍子知詩書燕支婦女好顏色  
齊紈魯縞推小車客行飲酒餐羊酥  
出門萬里不持刃三關比戶非危塗  
仲宣從軍自愁思班超投筆徒區區  
書生來游壯士臥題詩石壁蛟龍紆

秋懷

頽葉振危柯商音變新警冉冉盈玉階  
淒淒語金井元化行循環慘舒各無朕  
孰謂蒲柳心忽與秋氣併

灘江行送蘇虛谷同年

汝謙

還桂林兼懷龔茂田

一貞

君不見灘江江水零陵來  
虞山鳴玉千瀠洄  
桂嶺青青接繡嶺  
水光倒射馬王臺  
人家都在碧峯下  
萬松不動鳴如雷  
君家此中結茅屋  
青山四時落酒杯  
飲酒但醉不願醒  
灘江江水新潑醅  
何爲舍此不爲樂  
短衣匹馬隨塵埃  
塵埃自古長安市  
五侯第宅連雲起  
知君腹中經世書  
少年自欲干

天子如何不見曲陽侯  
咫尺仍落銅龍樓  
駑駘嘶風飽食聚  
驂駟日暮飢垂頭  
幽州十月初見雪  
城南草盡北風烈  
沙頭送客雙玉瓶  
驪駒蹴冰四蹄熱  
灘江江水眼中好  
但恐照人顏色老  
扁舟一去真浩然  
瘦馬三年卻自憐  
我家浙東更千里  
夢魂夜逐枯溪水  
今君歸隨秋雁飛  
到家已及春風始

風春水生菰蒲灘江江水如五湖玻璃汨瀟三百頃爲君一  
洗塵衣裾碧桃作花柳綿白飄然又醉山中廬爾時不覺開  
口笑世閒萬事徒區區靈川老龔好詩句別來一載今何如  
諸君自盡故鄉樂未知亦思故人無灘江江水雙鯉魚幾時  
寄我空中書

石門圖詩爲梅蘊生同年

植之作

昔時青田舟雙峯對森爽十年山水懷依依徒在想因君素  
壁圖得與滄洲賞飛流亦無聲氣凜空堂上英雄始泥蟠出  
輒潤寰壤于今空山中遺蹟猶可仰安得從白雲與子齊遠  
軼

贈秦澹如

細業

四首

太璞蘊奇珎朱絃希繁音斯人外黯淡抱道宜在襟  
蕙風送芳馥無言良已深浮雲日異態去去安可尋  
願言師古昔敦志重自今

長安冠蓋地賢雋亦相錯君相初翦求眾士欣有託  
云何盛世儒屢悲和氏玉屈信獨何屈世事有龍蠖  
俟命終無尤達人慕天爵

往者忽千載來者仍代更人生託大化甯爲草木榮  
先民日在夢憤樂時還并趨競息前猛履冲期晚成  
願資二仲益千秋希令名

靡靡原上草鬱鬱荆與蓬芳蘭不擇地憔悴誰爲容  
萬類日相伺哲人慎所同始信幽貞念卓爲君子蹤  
煙蘅儻未歇江

漢行相從

雪中短歌簡朱伯韓編修

琦

輕鞍怒馬飛兩輪疾塵高於西山雲朝官年來人未識坐中  
皇墳高著壁扣門剝啄百不應有時獨對賞心客我落京華  
騎瘦驢懷刺滅盡懶復書人嘲人笑良足畏得不相就蓬蒿  
居昨日北風今日雪津橋酒熟梅花發醉倒花前忽憶君想  
得新詩更清絕

愁霖歎

今年五月至八月赤烏遁逃雌蜺出高陵十丈化爲河城門  
水深行人沒長安旅舍如雞棲檐頭汨汨生青泥出門十步  
不識路白馬歸來成鐵驪偶得日光破霧出旋復陰靄迷高

低風師無道還助虐沈寒愈恐陽和弱羊裘當暑尙號寒知  
有凍尸委烏雀方今 聖人持玉衡整頓造化兼平成曰

嗚曰雨當效令胡爲積潦乖休徵卽此夏秋閒穡事都未畢  
北人種黃粱辛苦一年食螟蝗分蝕猶自可洪波捲去安所  
得大江以南亦告災沈陰作沴尤可哀傳聞老蛟決平地蝮  
蛇噴躍水上來縱有男兒能耕種高田枯木卑蒿萊蘇松十  
萬家家戶戶能笙歌自從入夏後屋瓦鳴青蛙漁人乘船  
早入市嫠婦求食宵臥蓺 聖恩甚念東南民 詔留  
漕米寬租緡倉皇溝壑誰到手官驕吏蠹能侵吞況乃雨勢  
惡爲虐良未已哀鴻縱能嗷嗷鳴羽毛沾溼誰活爾我欲呼  
天啟天口借刃爲斷雌蜺首雲霧沈沈復蔽之天門十二何

處有歸來屋漏牀牀移書生無用長咨嗟雖然亦有意外危盜賊竊恐飢民爲鳴庖盜賊無非飢民爲海上況聞妖狼啼

詠懷古詩人十六首

有序

言學無所就謬託於詩竊見古有作者篇論所著外有施於世用內無媿於躬行千載而下心嚮往焉其或抱負瑰詭而炫異太過蘭芳自焚君子病之至若浮佞之徒惑世盜譽雖文采斐然爲辱彌甚前者之迹皆後之鑑也爰自漢魏以來取其有當法戒者人系數言得詩十有六篇人不必備或耑舉一節本非尙論古人亦略示感發云爾先是桂林友人朱編修琦有詠唐宋詩人十篇意主說詩製作殊美今以此



求其更賦亦欲以同心之言無負斯志也

諸葛武侯

武侯昔未遇高臥南陽室淵淵梁父吟管樂亦匪匹一朝魚  
水歡遂信匡王術炎緒雖中傾高光有遺烈儻非三顧勤躬  
耕甯遽出

曹子建

建安六七子曹氏各鯨吼平原不名才本根出忠厚今觀美  
女篇豈落國風後抱道自古今文辭竟何有學詩媿未能屢  
詠徒在口

阮步兵

嗣宗詠懷作託旨本高妙豈無憂患心隱譎疑寡要濁世惡

危言禍機伏羣誚同時文章徒屢蒙鷹隼暴至人獨沈酣慮  
世復埋照

嵇叔夜

嵇生蘇門游頗希塵外景神仙世難逢邱壑固所請思深養  
生篇乃與憂患并孫登有忠言呂安同罹害學道苟未深負  
才誠匪幸

左祕書

左思跌宕才文章最邁上國斲生宗親哲人見先象朝冠雖  
偶加名爵豈能獎高歌招隱篇遂脫炎洲罔陸生亦盛名華  
亭徒悵快

劉太尉

太尉蒙世屯悲歌獨壯烈慨忼扶風豪志乃在臯闕嗟乎二  
伯勲孰者同心哲幽州豺虺心同舟坐胡越盧諶亦凡才哀  
哀昆吾折

陶靖節

柴桑雖沈飲乃心深向道平生所讀書獨謂魯叟好惜哉所  
遇非鬱鬱徒在抱方外亦偶游韜采藏其寶卓然晉遺民知  
者武陵老

陳正字

唐風六代餘元音苦淪斲子昂爲古風突繼阮公作眾喧廢  
淫哇李杜啟前躅始知文字權功與君相卓獨嗟道術疎暮  
齒仍投閣

宋之問

宏農小人尤屢蒙亂朝錄平生老松詩飾身託圭玉粵禽五色文甯揜殺人毒含沙竟奚爲身滅名俱辱文章固無根至人有幽燭

元道州

昔讀春陵行實動仁者慕杯湖已荒煙流風近若遇萬姓日艱虞鑽鉗亦有故豈無民命憂逼迫上官怒邈矣元使君我爲有生懼

杜拾遺

拾遺拾橡栗甯能飽一飯嗟哉稷契懷老受風塵困天寶方倉皇戎機屢顛頓嘯歌流滯閒實有救時論末俗方見憎祕

之誰敢獻

韓文公

退之乃文伯於詩第戲耳要其述作時孜孜在名理南食落  
蠻夷言高遂積誹嗚呼周孔來柰此逝者水當時三上書激  
切甯得已

柳柳州

攘攘貞元初子厚本國彥倉促託權臣牽連遂遠竄發憤山  
溪閒自訟良已晏才人功利心名高乃憂患述此示將來往  
者不可諫

李衛公

李公宰相子繼起陟台位獨於後進良力振窮巷滯奸人有

倚刀志疎觸時忌再起未伸眉  
黜遂遠棄斯人不可聞惻惻孤寒淚

王介甫

安石苦好古便便經在腹讀書昧時宜一誤不可復章蔡旣幸奸申商幾煽毒坐令民力彫兆彼天水促惜哉文學流折鼎還覆餗

陸渭南

放翁峨嵋仙作詩乃苦捷平生杜陵叟肝膽何暗合悲歌望中原老淚常映睫秦汪旣高勲韓岳嗟何及忠言不與聞在世已蠖蟄

鄉試報罷雜述五首

我生江海質，妄希彤廷儀。三年滯京邑，再戰摧鱗鬚。雲程無  
迅羽，枳棘仍卑棲。升沈有定分，知命復奚疑。況爲盛世士，  
豈有窮途嗟。天門日蕩蕩，岐路仍依依。平生志世用，至今還  
是非。

少小事文史，偃仰在雲蘿。獨居念前徽，無善以自淑。偶蒙匠  
石知，一洗樗櫟辱。君相初翹材，多士日追逐。同時二三子，

高步能捷足。回首知已恩，祇增方寸慙。青雲隔曾闥，白日飛

轉轂。寂寂鍾子期，去矣不我復。

先師史松軒先生卒三年矣

平生畏離別，所樂天性全。出門不百里，亦關父母憐。云何慕  
榮祿，束帶趨幽燕。臨行強笑語，於中誠黯然。身名有蹭蹬，日  
月成推遷。我親昔送我，相視雙鬢元。昨夜夢見之，亦頗成華

顛得無甘旨缺或者思慮牽越鳥隨北風歸雲何婉婉安得有羽翼飛墮父母前

古人有述作大道披榛荆少年惜廢學乃以歌詩鳴輶軒在前史亦云資理平下者申美刺猶得區邪貞大雅既衰替桑濮喧咸其端居每懷古鬱鬱在中情文儒識本業庶幾淳化成往者不可諫來者安可輕

昔者同志友今者各天涯天涯不可即踽踽將如何湯子

秋海

昔愛我投詩載滿車張衡詩氣蓋世亦以高才誇平生好古

意時名亦何加顧幸君子譽不遂眾人譁驩騶各寂寞吳鴻

空摩挲直言老郎署席帽歸江茫而我何爲者安得云蹉跎

明德久未進負慚何其多



答董嘯菴

蓉鏡

曰余拙談笑獨處誰匹儔晚得素心客落落中相求嘯歌忘  
晨夕自夏還徂秋西風昨夜至落葉迷林邱雲鵬有蹭蹬迅  
羽徒嘲啾趨猛旣屢挫有命我何尤吾子遺佳翰清風紆煩  
憂煩憂亦何有欲言心懷羞逝波日汨汨滄海東悠悠臨流  
坐悵望欲濟無輕舟念此亦徒爾時哉不我留南榮戒思慮  
北學求好修徇名易爲僞崇善庶可謀卽此勉元髮於焉訊  
好述獨懷珪璧贈惜無瓊瑤酌

遜學齋詩鈔卷第一終

遜學齋詩鈔卷第二

瑞安孫衣言琴西

古體詩五十三首

答伊藹堂

涓

二首

辛丑

與子兩寂寞無端心相親相親尙如昨日月亦屢新士生各有志無爲悲賤貧潛穎偶失色陵茗或先春三冬霜霰會始知造物仁  
自與人事接鬱鬱何其多往往中夜起如聞勞者歌顧念當世士勲德已嵯峨才拙旣無用何以違巖阿阮生昔嗜酒沈醉不言佗

訪伊藹堂遂畱飲姚四秋士亦至歸書長歌示藹堂且

索秋士同作

門前老樹如臥槎東風動地春無花雙扉晝掩日光瘦我來  
打門雞怒譁入門兒女飢無色苦催買酒急具食東家酒徒  
亦相思半年不見今有髭我自一滴不上口幸有姚侯飲一  
斗飲閒頗自言窮愁鐙花檐竹聲啾啾我笑謂君莫復爾人  
生有酒無百憂君不見朝入臺暮入省七貴池館相經過千  
金裘馬日馳騁一朝化爲北邙塵但供秀人笑齒冷又不見  
魏其博陸連天姻恩威在手勢絕倫豈知驕溢還傾覆或把  
朱樓奪與人世閒萬事皆如此黃雀亦笑螳螂死孰如爾我  
安泥塗猶得相對雙酒壺壺中不空客常滿行樂但恨春宵  
短開門四望天無河清風吹月月生波迴光倒射金叵羅卻

復照見君顏  
酡回頭聚散將奈何  
爲我乘醉同高歌  
世間哀樂何其多

棄婦辭

憶妾未嫁時與君俱少年  
明月三五夕誰似妾容顏  
偶因薦蘿契得與松柏緣  
哲人慕高義女子從所天  
脩裾雙鳴佩尺步不敢愆  
念得申大義畢茲結髮恩  
時命有屯蹇中道遭棄捐  
坐閱秋草歇復見春華妍  
憂心亂蓬葆芳澤違蘭荃  
窗前嫁時鏡無情猶團圓  
緘之不敢照祇恐淚流泉  
淚落不復返腸斷惟自憐  
孤根寄磐石懷義終拳拳  
不惜故人棄但願新人賢  
安得將妾意移置君懷間

藹堂索題美人

美人嬌無媒江臯偶遺跡秋水芙蓉花臨風見顏色落日動  
微波芳塵冷瑤席獨立思佳期露下煙蘅夕

藹堂以未與騎射格於禮部試

論詩酌周四岷帆學源

風騷有絕響厥理垂萬祀文徒習便辟遂爲風俗恥浙派沿  
朱查後賢掩前軌彼自盛時名淵源不在此東流更百年折  
楊悅里耳羣聞鼓嚨胡口衆孰能止詞章九牛毛惜此方寸  
詭同心儻起予請觀六義始

江亭醉歌呈黃樹齋先生

城南樹綠風吹衣江亭高與城頭齊新鶯稚燕亂窺客驕驕  
脫銜相向嘶十日楊花吹作雪坐卷珠簾欲愁絕卻思萬事  
殊等閒春風動地金盃寬眼前有酒竟須醉醉卽拄笏看西

山

華山雲送袁翼臣歸華陰

君臥華山雲我飲甌江春千山萬山不相見一朝握手長安塵長安塵土牛馬走落落相看意殊否君言昔居華山巔自掃落花住五年明星玉女并手攀十丈蓮黃河一綫雲閒來走入懷抱如空煙松花釀酒酌十斗醉呼李白看青天丹砂不就不足惜奈何墮作馬上客客居蓬蒿青泥門可憐但遭俗眼白我亦誤落塵埃閒夜夢往往居青山金壺玉膾不知愛祇有白鷗憐人頑燕山六月火雲厚蘆溝橋邊萬行柳下馬折柳枝上馬看君走柳枝婀娜風吹衣千山萬山獨回首今君仍臥華山雲華山雲亦長隨君三花玉樹行可食羣仙

笙管空中聞卻看明月雲臺上記得相思有故人

送秦澹如返梁溪卽題其藕湖漁隱卷子

芙蓉水中流客行湖上舟客心與流水東去不可留送君羨君歸疾下三千里亭亭芙蓉花冉冉落江水

十剎海觀荷花歌

北湖湖頭萬荷花輕風吹香來酒家珠簾不捲見秋水新蒲煙柳交傾斜昨者湖頭一夕雨洗出紅粧尤楚楚湖光澹沲青玉環安得人閒有塵土高鞍翩翩不同來天遣酒人時傾杯手揮荷葉持勸客世閒哀樂何有哉船舫鐙球五百載韋杜芳華幾遷改一尊聚散尤無常只今惟有煙波在悠悠復悠悠東流不掉頭昔人不見今人游年年相送湖上樓卽如



芙蓉顏色好昨日開花今亦老金盃在手且莫辭相向花前  
須醉倒

庭樹行

太學西廂琉球學者受經之所也庭有槐當堂之正  
中蓋百年物矣爲之詩以寵之

堂前大槐今百年午陰十丈圍蒼煙羲和御日避高蓋微風  
瑟瑟清吟蟬巖阿老死固無數豫章檜枯誰能憐蟠根似汝  
猶得地伏雌乃亦登其巔截承露盤終有用坐困霜霰知未  
然

送王白海博士

延慶

歸東牟

先生到官坐堂舍蕭蕭白髮垂兩肩談經折角百不合有時

白眼看青天廣文官冷已成例五車在腹惡能賢太倉脫粟  
尙不飽安得常人與酒錢青山猿鶴忽在夢塵中蹇驢不足  
憐故鄉東海種瑤草神仙亦須致身早他年若見安期生相  
向還道容顏好

哀虎門

虎門沙角長城堅元帥氣驕自云賢黑夷捲席入平地礮火  
夜落城樓前苦戰身死關將軍坐視不救誰能憐廣州婦女  
哭向天白骨滿地羣羊眠

哀廈門

紅毛昨日屠廈門傳聞殺戮搜雞豚惡風十日火不滅惡夷  
歌舞街市喧提督自言捕小盜遠隔州島安能援颶潮徑去

幸無事天陰鬼哭遺空村

哀舟山

舟山復後草未蘇一夜奔鯨滿海水可惜忠勇三總兵苦戰  
六日同日死蛟門官軍不敢渡花裙夷人滿城市殺賊尤多  
賊怒噴嗚呼輾割王將軍

哀明州

明州萬家吹笙竽近乃膏血污泥塗招寶山前萬貔虎見賊  
卽走何其愚母從子走妻求夫我軍已遠空號呼元帥倉卒  
亦死賊草閒老兵坐歎息

楊將軍歌

偶讀楊忠武侯傳歌以紀之

將軍馬上揮雙刀一生殺賊紛如毛西上崑崙掃月窟東涉

滄海收風濤

先皇駕馭多雄傑將軍戰功初第一

紫宸殿前披軍書往往

九重喜動色爾時楚蜀多烽

煙黃巾比戶稱戈鋌方舟屢蔽漢江下吳鹽欲斷夔門前黔  
陽花當尤負咀毒矢殺人血濡縷深榛苦霧不見天豈但黃  
金與子午官兵食肉良可哀武陽壯士如死灰將軍年少人  
未識強弓硬箭營門開回頭叱馬躍十丈萬人隊中騰身上  
電光一綫轉眼無前山但聞霹靂響平原格鬪尤如神見賊  
愈多能忘身錦衣繡帽結束好營前勒馬笑不嗔臂槍一呼  
萬人急五花如龍追不及逐北歸來秋風腥寶刀未洗血光  
溼十年戰罷沙塵清西南萬里安春耕豈獨兵威振殊俗見  
啼不敢聞姓名 國家折衝在千里欲守四方須猛士頗聞

當時賊中言相戒莫遇楊鬚子今者烽火連江津攻城殺將  
何紛紛蠻夷椎結固當滅高桅大礮安可聞廉頗李牧今何  
人安得復有楊將軍

長歌行送伊子

十日不見心相思一日相見傷別離問君別我更何往遼陽  
千里風吹衣幽州落木秋蕭索坐對妻孥猶不樂何爲遠去  
關山難離亭日暮羊裘薄知君此行由飢寒勉事車馬營朝  
餐豈有朱門堪曳履何況薄俗輕儒冠東南烽煙亦未已奔  
鯨毒浪滿江水昨者浙東失元戎羽書一日走千里島夷船  
柁使逆風得水如鬼來無蹤已出千軍駐金口申命大將防  
遼東羽林猛士正在道擊鼓吹竽何草草臨行自謂風雲時

相向各羨金鞍好君也章甫衣懸鶉安得結束趨沙塵尋常  
談論不出口此豈有意高官勲官高於世亦何濟九衢冠蓋  
紛如沸安昌絃箏絕可憐廷尉門庭坐愁思君不見達人萬  
事如鴻毛壯士閉戶親醇醪少游不敢騎鞍馬仲蔚時復安  
蓬蒿又不見孫生落落江南客三年浪走長安陌夢中識路  
愁鼓鼙君乃何爲事鞭策薊門九月秋風悲夜夜征鴻入塞  
飛前有豺狼後猛虎遠游雖樂不如歸

雪中寄城南諸友人

濛濛庭樹微曖曖初景滅北風昨戒寒朝旦已霏雪寂居寡  
歡悰凍禽自嘲啻日暮聞疎鐘奈此素心客

王少鶴戶部

錫振

招飲沮雪不能出城卻寄一首并奉

濂甫王寅

仰承君子招蓄念慰疇昔況聞羣妙萃一得罄心跡昨來雨  
雪過林端尙餘滴坐畏車馬勞遂令憂思積閒庭飛鳥還城  
闕遠鐘夕

書姚子文

文詰

紅鹽館遺詩後

君家伯仲閒

謂秋士子連昆季

相見各秀出之子亦清才在時惜疎

闊邇來披遺文彌復挹芳烈矢詩雖不多肝肺抱淒切云何  
大命乖坐悲瑤樹折國風渺難留鮑謝孰遺轍今君已邱邱  
何以慰寂蔑

毛西河朱竹垞二先生同游西湖像韓戶部索爲詩像

鄭元慶繪羅山人聘重  
摹之舊藏法梧門學士

五老林下蹤多在西湖上當時盛文章隔江屹相望風雲念  
已疎煙水清可傍靈光百年來正始惜淪喪梧門士林舊遺  
景希宗匠筆妙出山人高懷兩清曠哲人逝已遐東流日奔  
宕詩龕亦飄零游跡矧可訪多君善收羅殘縑識所仰余生  
乏素修因茲起遐尙

松下幽人圖

黑雲墮天圍鶴巢老龍拔海翹尾梢炎官行空避高蓋蛻羽  
得志鳴蕭蕭非莊非惠彼誰子左肩赤袒趺團茅俗人何顏  
來促剋長眉蒼古心寂寥

學生作琉球食戲述

鯨魚羊豕腴肉剝瓊玉膚此物穴溟渤雄與蛟鱷徒不能鉤



餌致乃爲黃金屑

琉球生云捕鯨魚必以黃金刺之乃死

海鰻止是蛇強名甯

稍殊獮形改鬱屈怒目猶睚眦自非有奇疾聚毒安敢姑海

馬稍恨腥馬首身是魚家蔬

魚名亦佳蘇曰

最易得紫黑櫓枯削

未投沸水脆美回昭蘇其餘歇瑣碎大略如越吳調和酸鹹

雜美醬豆麥俱佐之美姬酒嚼米由彼姝不知施邪媒取醉

咳唾餘

美姬酒云由女子嚼米爲之

我生本南食下咽氣自如持用變北

客掩鼻走絕祛彼此更誇詫未可相賢愚粵人羹蝦蟇抱筴

如瓊琚北人食乳酪乃不知純鱸食焉安所甘居焉安所娛

述此聊爲笑匪用誇庖廚

答乙垣

癸卯

冷官使酒怒其曹矮屋打頭議論高長安貴人日相索乃樓

佛寺門蓬蒿日高始起飢忘食興臺失色相嘲警作詩尤捷  
苦成癖往往遺我無乃勞句奇語怪強索和秋蠅凍縮安敢  
號我抱六經教太學於世亦不如鴻毛昨者夜夢落湖水與  
君他日租輕舸

郊外

久困闌市居偶來塵外賞始知春草生芊芊雨餘長新花襲  
路芳微風出林響吠蛤有同聲嘲鳥匪一吭遙望田閒人各  
循沙岸往云何盛陽月未見偶耕壤荒塗互坡陀敗屋傍蔬  
蔣湖水方澄深安得理歸榜

過萬壽寺

言遵沙岸行遂造郭西寺琳宮蒼藹間芳樹紛如翳仙犬吠

迎人林鴿驚屢睨稍進巖洞幽遠叩禪扉閉砌草細承趺山  
花靜自媚梵放兼疎鐘縹緲隔松翠余生本素心矧此遂幽  
詣顧念繫世蹤難辨無生諦出門見歸人落日在埤垠

老彭觀井圖

圖不知何人作貌老人柳下以繩繫腰閒而維之柳  
一童子背後挽之蓋如臨深淵之意宋陳靖爲之銘  
今嵌國子監祭酒齋壁

尋常不思山鞠翫溺人必笑忘其躬至人閉關七百載何事  
乃畏濡首凶畫師鑿空假柱史坐覺愚蒙有妙理益信君子  
防未然輓轡宛轉悲寒泉青牛出關遂西去衰周避世非神  
仙凌晨覽壁重歎息長繩繫腰計未得不見人生行路難平

地何必無波瀾

祭酒松岑先生

花沙納

於太學東廂補種丁香命作長

歌

太學堂西雙老槐千載不忘許覃懷今公種花得手澤坐覺  
春風迴塵埃水南許公昔流宕丁香相向堂階上中閒衰萎  
不記時日日黃蜂鳴惆悵老師祭酒今八年諸生博士方翕  
然但恨官齋過寥寂要與瑀飾追華妍丁香突兀復相見已  
有芳風來青甸力培根本防枝柯自許生機轉蔥蒨東風三  
月初開花游絲舞絮交傾斜碧紗畫靜照紅雪顏色頗似相  
矜誇我來看花繞百匝落英曉露衣襟溼花閒黃雀如栗留  
避人相趁雙蝴蝶回頭卻看牆西松心如鐵石枝青銅知公

仁者儻有意豈得久在風霜中

琉球貢使向紹元都通事梁必達來見賦此爲贈

伏犀八髮高頰權美髯如戟目炯然黃冠突兀錦花帶深衣  
匹帛行圈豚中山使者顏色好入門罄折形恭虔搓手作禮  
致其敬其心孔殷未能言唐營通官精爽緊代陳款曲詞便  
便攘袂出手手指天

皇帝聖德臨無偏次言先生教誨

厚諸生小子坯爲甄寡君諸卿諸大夫傳語致謝感在肝我  
言此乃我職然百不盡一心煩煎惟有

帝德不可似博

如天覆深九淵仁風四噓草木茁天光下照日月懸大夫行  
矣忠其君農力鋤犁士誦絃上無僭替民無怨永爲鄒魯傳  
萬年此所以報報以義不在貌恭仍獻珍我睨使者首愈俛

下手至膝坐弗安自循其帶持示我我知爾意無待論門外  
僕僮靜兀兀黑帕六角衣爛斑嗚咿耳語類有會鞠躬偵伺  
頭如龜作詩與爾述我語歸示其人傳兒孫

招王少鶴

綠槐萍合城南隅王郎不見今何如平生作詩頗愛我苦謂  
膚癩如鰻魚我今有作畏示人恐犯世議生齟齬近者病暑  
新出城日日子由同聽雨犀首無事如能來更折池荷薦清  
醑

偶至安定門外見道旁耕者感賦四首

甲辰

郊原春正好芳甸含晴暄農居三四家小小自成村是時新  
雨足耒鋤各在門釐牟方被隴瓜豆亦上藩力耕求飽食不

知勞其身況此井閭近相依家室親我觀偶耕者眞如義皇民

長安富貴窟朱門交長衢南鄰聚蹴鞠北里吹笙竽金錢藉素  
有誰復思其初坐使窮巷子逼迫無立錫豈惟物力竭漸成  
風俗瘠巧奸肆無已口腹爭相屠安得返淳樸使各歸耘鋤

西戎地磽确力穡聞邠民畫井治涿鹿遺策帝軒轅矧此禹  
九州田賦雄中原日暮薊門臺登高覽方圓平臯飛鳥去齊  
梁東鬱蟠如何溝洫廢千里惟黃塵遂令黔首困謀生亡其  
根山川日吐納雨露施天仁人力不解取錐刀乃徒煩我本  
南畝民有田北山麓春耕散芳原秋斂就平陸鳥雀欣

及時老幼嘉有熟饔飧不後人自計良已足奈何舍之去甘  
爲人事役未綴朝官班已盜太倉粟雖免四體勤得無方寸  
惡追思父兄輩林下猶樵牧安得隨飛鴻返我谷口屋

古意四首

君不見浮雲在天如車蓋倏忽如馬如白衣人藏其心亦如  
此辭甘目動將我欺又不見仲父鮑叔思用齊託身仇讐不  
相疑漢朝翟公罷官去門可羅雀無人知常時論交誓生死  
千秋肝膽真是誰黃農虞夏去我久無懷之民不可期何不  
閉門謹謝客有酒可飲無危機

安得秦時咸陽鏡照人肝膽別賢佞安得夏后九牧金鑄象  
耳魃垂古今白璧非不珍青蠅來相尋嫫母施朱粉巧笑移



人心請君勿復長太息人事悠悠安可測君不見月中桂樹  
千丈根利刃日斫旋團團蝦蟆幸脫后羿矢爬沙吐舌青雲  
端雷公電鞭且束手鉛刀頓刃空自歎

越山名工歐冶子鑄出龍泉如秋水瑩以鸛鵒膏磨用洮河  
砥珍珠寶匣雙蟠龍夜中有聲電光紫爲我謂劍鳴且休我  
生無恩復無仇臨江節士朝伐鼓得汝去雪邊疆羞盡戮鯨  
鯢血海水歸與主人俱封侯不然且隨張長公坐鎮臺閣威  
生風

朝來闔闔風飄飄吹衣裾騰身而上千萬里顧視遠與人閒  
殊星官羽人立無數門前青龍對伏跌東方諧謔手招我舍  
人日夜來投壺我怒欲唾不可顧天公大笑下士愚姁娥美

好扶輪輿南極老人工拜趨北斗高高揭柄尾坐挹酒漿真  
良圖

題圖

一童煎茶名樵青一童負琴行亭亭旁有一鶴如長人掉頭  
似厭池閒腥林煙墮次作寒綠巖石結屋穿瓏玲茫茫四顧  
還獨立有琴可彈無人聽清風入松流水遠誰其知者遼東  
丁

題董仲常先生

游詩後兼悼項雁湖母舅

壽

羅陽江上流水怒出石壁鑿天攢萬山人少乃多石先生始  
得名壇坫號詞伯同鄉數老翁文字嘗接席時聞誦公詩大  
叫頭脫幘我童駭無知在旁目屢覲稍長耳尤熟但未識顏

色老矣猶遠遊半世諸侯客蛇年月在辰我玷學官籍侍郎

校文字

石土先生

多士集如鯽公始沅湘歸慰我客中覲矯然蒼

松姿談笑

英雄

無敵自云齒牙衰我惜須鬢白頗思獻所能未

語顏已赤中止心然疑有懷終未釋逡巡走京師遂與鄉縣

隔客居有奇逢公子來我即郡邸同宵鐙坐語旦連夕乘閒

諮起居步健尙善食賁緣得公詩沙水獻丹碧長安富王侯

冠蓋日騰歎郎君來求官旅食翻困迫行車遂載脂別袖挽

何獲依依國西門秋葉盈巷陌離魂久未蘇驚問來何亟遂

聞先生亡少微就斂匿諸子我所知何術謀窳穽懷才死屯

遭天意良難測益悲故鄉舊文采漸衰息邇來三四年往往

喪耄碩我舅雁湖翁賢人實同厄往嘗讀其詩陶韋不疏逖

衡下歌衛風蠱上用周易平生寡交游與公轉莫逆一老守  
遺書俗眼不同識一窮走四方曾未展寸尺老成仍凋亡後  
生日淪惑深宵披遺文涼月淒半壁卻念垂姓名豈皆在竹  
帛甫白兩荒涼文章今猶烈我觀二公詩亦豈媿古昔後人  
知皆賢隻字要當惜

召伯舟中戲述 乙巳

揚州四月大麥熟田家割麥兼插田新秧刺水綠針出東風  
拂拂鋪碧瓊舟子舍舟歸踏車不知風利堪帆船有女赤腳  
豈其妻短歌相和復笑謹鳴鉦日暮車益急湖頭但作虹飲  
川此邦沃饒情可憐安得力作如汝賢我當爲汝祈皇天永  
無旱潦長豐年

夜中過召伯湖

暝色互蒼煙鳴榔去未已逝鳥沒無蹤前途尙幾里四顧但  
溟濛那復辨洲沚卻望三星垂慘淡白在水客行涉江湖性  
命委舟子夜深鼃鼃宮豈無波浪起篷背聞高歌和者在柁  
尾危腸聊暫寬中宵屢憂喜

未至揚州二十里遇大風雨

戕戕西北雲壁立深墨色電光掣微明雷鼓催轉急雨勢縱  
不能萬籟噤已息須臾雲氣異近山蕩片白模糊挾狂風東  
追日輪及遂如九河翻坐看滄海立水煙合溟濛危柯爭摧  
拉我舟逃蘆叢高空屢騰擲卻愁金焦閒何處容一葉無何  
雷已收風止雨亦歇崩雲開夕陽下照大地溼還望平湖光

靜如鏡面帖益知造化奇變怪在呼吸我當任自然未來不可測

揚州曉發

濛濛水上煙霏霏林表霧城門旦未開鴉鳴自知曙笑語隔河繁行人已待渡我舟逐輕風鳴榔亦南去但聞疎鐘聲危譙隱叢樹

渡江

高帆挾風色我行凌長江金焦碧相映北固遙蒼蒼蛟龍跋怒浪燕雀去未央中流快雄覽客懷慨以慷大江限南北終古陽侯狂英雄昔割據恃此爲保疆本朝馭炎極親軍雷勤良承平二百載萬里澄扶桑島夷昔逆命長風驅危檣機

船突淞口礮火驚維揚當關萬貔虎昔壯今何恒將軍苦逃  
死斂兵櫻城隍遂令藩衛撤開門納豺狼何來萬鬼雄嘯笑  
鍾山陽懸軍入死地兵法非所詳安得習流士據險扼其吭  
奈何事機誤重使毒歛張來時望卽走去乃飽自颺豈必天  
險異或非人謀臧至今兵死血濁浪猶元黃哀歌投江水風  
悲波浪浪

早發蘇州

早發闔閭城城上烏始啼鳴榔赴曙色霧薄風淒淒路隨葭  
莢轉樹與帆檣移青山若遠近白雲得所依

雨中過鵲脰湖

湖上夕煙生遠隨流水永汀洲幾人家濛濛林際暝青青菰

蒲深汎汎鷗鷺靜漁舟爾何歸我欲就輕艇

至塘棲順風抵武林門

登舟已十日九日南風顛毒哉風伯虐令我歸期愆晨興轉  
風色仰見高帆懸船頭嫋細雪暗浪鳴濺濺舟師坐倚柁有  
時歌扣舷滯滯旣以解無意爭人先須臾兩高峯蒼蒼盈我  
前流波遠照耀翠眉舒連蜷知是湖上山清光爲誰妍垂楊  
過微雨新荷浮綠錢明朝買斗酒去醉西湖船

金華溪中晚泊

落日在遙渚四山氣蒼然行人向沙岸知歸何處村我舟晚  
亦罷迴汀依輕煙時見雲際火已闌林下門客行風水閒難  
與居者論



張氏樓望陶山

朝登主人樓前對陶山青白雲在層嶺依依如有情高蓮擢  
秀壁重萼含瑤屏眞仙一託迹巖穴畱其名丈夫不用世猶  
當求長生我豈如俗士百年徒勞形

郡城看菊花

今春看花棗花舊城南垂柳青氍毹秋風雙槳擢湖淥華蓋  
山前看黃菊長安菊花今已繁白紙坊頭車接轂八年京洛  
眞倦游此度爲誰成淹畱豈有佳客同游宴但數花朵消清  
秋湖田霜涼蟹黃出新筍美酒玉缸活明朝迴棹演溪頭窗  
前但候梅花發

九日登城東隆山慨然作歌

遼學齋詩鈔卷第二  
隆山如巨虹下飲江水清蒼煙上縹繞衆仙羅宮庭嘉游值  
令節同志招友生是時木葉下山色含秋澄攀蘿附危石抬  
級臨曾城振衣在絕頂天風吹泠泠卻顧塵世隘雁鷺猶哀  
鳴江波日浩蕩遠勢趨滄溟帆檣來激矢舟楫如浮萍安得  
埽雲霧坐看三山青還思海氣惡萬里奔鯢鯨粵閩縱毒蝕  
吳越隳名城茲鄉幸困瘠猶得安農耕前憂旣已遠來慮乃  
交并且資象教力一舒曠士情羣聲闕螻蟻萬室棲焦冥騰  
身叩天闕誰兮我同行

遼學齋詩鈔卷第二終